

# Hotelsektor help Hospitality blom

**Elma Kloppers, Johannesburg**

Danksy gunstige toerisme-toestande in die land het die Hospitality Property Fund se resultate vir die jaar tot einde Junie die verwagting oortref.

Dié fonds wat eksklusief belê is in hotels en oorde, se B-eenhede het robuuste groei van 18,3% gelever, wat op 166,16c per kopeenheid te staan kom. Die uitkering per A-eenheid beloop 105,49c per kopeenheid, wat in ooreenstemming is met die maatskappy se uitkeringstruktuur.

Mnr. Evan Jankelowitz, mede-hoof van Stanlib se eiendomsfondse, sê die syfers weer spieël dat die hotelsektor besig

is om hoog te vlieg. Hy sê ook dat dié sektor beduidend ondervoorsien was die afgelope paar jaar.

Mnr. Gerald Nelson, uitvoerende hoof van Hospitality, sê die buitelandsetoerisme-klimaat bly positief en al Hospitality se eiendomme was vol verhuur gedurende die jaar, met 'n gemiddelde verhuringstydperk van 8,4 jaar.

Hy sê Hospitality is besig met die opgradering en herontwikkeling van verskeie eiendomme teen 'n gekombineerde kapitaalwaarde van sowat R500 miljoen om langtermyn-groei te maksimaliseer.

Die meerderheid van die projekte sal in die komende

boekjaar afgehandel word. Onder die eiendomme wat opgekikker word, is die Rosebank-hotel, met 'n herontwikkeling van R295 miljoen en die Mount Grace Country House & Spa teen R130 miljoen.

Hospitality se belange in 22 hotel- en oordontwikkelings in Suid-Afrika is einde Junie onafhanklik gewaardeer teen R2,3 miljard.

Nelson sê hoewel die komende boekjaar waarskynlik met uitdagings sal kom, is die maatskappy goed geplaas om voordeel te trek uit die gunstige klimaat in die hotelbedryf, asook uit die nuut-opgegradeerde hotels binne die portefeulje.

